



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu Kazu
Tribunál Distritál Baukau
Maiu 2019

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kulakér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 23

Artigu	Tipu kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	17
Artigu 154 KP	Maus tratus ba kónjuje	4
Artigu 177 & 182 KP	Abuzu seksuál ba menór ho agravasaun	1
Artigu 253 KP	Roubu no ofensa ba integridade fízika simples	1
Totál		23

2. Totál desizaun ne'ebé JSMP monitoriza: 16

Tipu desizaun	Númeru
Pena prizaun (Artigu 66)	2
Suspensaun ba prizaun nia ezekusaun (Artigu 68 KP)	10
Suspensaun ba prizaun nia ezekusaun (Artigu 68 KP) ho regra ba konduta (Artigu 70(g))	1
Suspensaun ba prizaun nia ezekusaun (Artigu 68 KP) ho indemnizasaun sivíl (Artigu 69 KP)	1
Pena multa (Artigu 67 KP)	2
Totál	16

3. Total kazu sira ne'ebé adia tuir JSMP nia monitorizasaun: 0

4. Total kazu sira ne'ebé sei kontinua prosesu tuir JSMP nia monitorizasaun: 7

B. Dekrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0105/18. LASIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Luis H. Rangel da Cruz
Defeza : Dr. Sidonio M. Sarmiento
Desizaun : Pena multa US\$60.00

Iha 02 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida NER hasoru nia la'en (ajente polísia), iha Distritu Lautem.

Akuzasaun Prokuradór

Prokuradór akuza katak iha 25 Abril 2018, iha oras tuku 10:00 dadeer, arguida ba iha eskuadra polísia no bolu lezadu atu fila ba uma. Iha momentu ne'ebá lezadu tuur hela ho nia kolega sira. Lezadu tuir arguida fila ba uma no bainhira to'o iha uma, arguida save tiha odamatan no rakut lezadu nia oin to'o kanek.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguida konfesa integralmente ba faktu sira iha akuzasaun, arrepende no deklarata katak depoisde akontesimentu arguida ho lezadu di'ak malu filafali. Nune'e mós lezadu kontinua konfirma ba faktu hotu iha akuzasaun no deklarata katak di'ak malu ona ho arguida to'o agora arguida la repete ninia hahalok hasoru lezadu.

Alegasaun finál

Prokuradór konsidera arguida provadu komete faktu sira iha akuzasaun, nune'e maski kazu envolve feen baku la'en la barak maibé lei define katak ema hotu hanesan iha lei nia oin. Tanba ne'e, husu ba tribunál atu kondena arguida ho pena ne'ebé mínimu husi moldura penál krime ida ne'e.

Enkuantu parte defeza haktuir katak arguida konfesa faktu hotu iha akuzasaun, arrepende ninia hahalok, di'ak malu ona ho lezadu no arguida fo'in mai hatan iha tribunál. Tanba ne'e, husu ba tribunál atu aplika pena ne'ebé kmaan liu ba arguida.

Desizaun

Depoisde avalia faktu hotu, tribunál prova katak arguida ba bolu duni lezadu iha eskuadra polísia. Bainhira arguida no lezadu to'o iha uma, arguida xave tiha odamatan no rakut lezadu nia oin to'o kanek. Bazeia ba faktu provadu hirak-ne'e, tribunál kondena arguida ho pena multa US\$60.00 ne'ebé sei selu US\$0.50 kada loron durante loron 120. Bainhira arguida la selu pena multa ne'e, arguida sei kumpri iha prizaun durante loron 80 prizaun.

2. Krime ofensa ba integridade fízika simples ho natureza violénsia doméstika

Nú. Prosesu : 0029/18. BCSIC
Kompozisaun Tribunál : Singulár
Juis : Dr. Jose Quintão
Prokuradór : Dr. Ambrosio Rangel Freitas
Defeza : Dr. Sidonio M. Sarmiento
Desizaun : Pena prizaun fulan 6 suspende ba tinan 1

Iha 02 Maiu 2019, Tribunál Distritál Baukau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FAX hasoru nia feen, iha Distritu Baukau.

Akuzasaun Prokuradór

Prokuradór akuza katak iha 17 Feveireiru 2019, oras tuku 21:00 kalan, arguidu ho lezada diskute malu kona-ba lezada deskonfia arguidu iha relasaun amante ho feto seluk. Arguidu foti ai-pedasuk natoon ida baku dala rua iha lezada nia kabaas no rezulta lezada sofre moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa katak faktu hotu iha akuzasaun ne'ebé prokuradór akuza ba arguidu loos hotu. Arguidu arrepende ninia hahalok, di'ak malu ona ho lezada no deklarata katak desde moris hamutuk ho lezada arguidu fo'in primeiravés baku lezada. Depoisde akontesimentu ne'e arguidu nunka baku tan ona lezada to'o agora nafatin moris hamutuk hanesan feen ho la'en. Arguidu nu'udar peskadór ho rendimentu fulan ida maizumenus US\$50.00 ka US\$60.00.

Iha parte seluk, lezada mós kontinua konfirma faktu sira iha akuzasaun no konfirma mós ho deklarasaun arguidu nian katak depoisde akontesimentu arguidu la baku ona lezada.

Alegasaun finál

Prokuradór haktuir katak arguidu provadu komete faktu hotu iha akuzasaun tanba arguidu konfesa no konfirma mós husi lezada. Maski nune'e, arguidu nafatin tenke hetan kondenasaun tanba arguidu mak nu'udar la'en ne'ebé iha responsabilidade proteje família maibé pelu-kontrariu arguidu halo fali agresaun hasoru lezada. Tanba ne'e, husu ba tribunál kondena arguidu ba pena prizaun fulan neen suspende ba tinan ida.

Enkuantu, defeza haktuir katak arguidu konfesa faktu hotu iha akuzasaun, arguidu foin primeiravés komete krime hasoru lezada, arrepende ninia hahalok no di'ak malu ona ho lezada. Tanba ne'e, husu ba tribunál fó pena ne'ebé kmaan liu ba arguidu.

Desizaun

Depoide avalia faktu hotu, tribunál prova katak arguidu ho lezada diskute malu kona-ba lezada deskonfia arguidu iha relasaun amante ho fetu seluk no arguidu foti ai pedasuk ida baku dala rua iha lezada nia kabaas no rezulta lezada sofre moras no bubu. Bazeia ba faktu provadu no sirkunstánsia atenuante no agravante sira ne'e, tribunál no kondena arguidu ho pena prizaun fulan neen suspende ba tinan ida.

3. Krime ofensa ba integridade física simples ho natureza violência doméstica

Nú. Prosesu : 0019/18. VQOSU
Kompozisaun Tribunál : Singulár
Juis : Dra. Ersília de Jesus
Prokuradór : Dr. Domingos Gouveia Barreto
Defeza : Dr. Sidonio M. Sarmiento
Desizaun : Pena prizaun fulan 8 suspende ba tinan 1 fulan 8

Iha 03 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MdS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 11 Outubru 2018, oras tuku 15:00 lokraik, arguidu no lezada diskute malu kona-ba arguidu tolok lezada. Bainhira diskute malu arguidu foti fatuk tuda dala rua iha lezada nia kotuk laran, tuku dala ida iha matan, silu lezada nia liman ba kotuk no riba lezada ba kama laran. Lezada hadeer husi kama laran no halai sai tiha ba li'ur, arguidu duni tuir lezada, toman lezada no tuku dala haat iha lezada hasan sorin karuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu di'ak malu ona ho lezada no promete sei la komete tan krime hasoru lezada iha futuru. Arguidu mós deklarata katak desde sira forma família iha 2017, arguidu foin primeiravés halo agresaun hasoru lezada.

Aleinde ne'e, lezada mós konfirma faktu hotu iha akuzasaun no deklarata katak depoisde akontesimentu lezada ba halo tratamentu iha sentru saúde. Lezada deklarata mós katak hafoin liu loron rua sira di'ak malu filafali no to'o agora arguidu la baku ona lezada.

Alegasaun final

Prokuradór haktuir katak arguidu komete duni faktu sira iha akuzasaun tanba arguidu konfesa no konfirma mós husi lezada. Mezmu nune'e, kestaun la'os arguidu ho lezada di'ak malu ona maibé arguidu halo agresaun hasoru lezada no krime violénsia doméstika nu'udar krime ne'ebé rejista aas tebes. Tanba ne'e, husu tribunál atu aplika pena ne'ebé forte hodi eduka arguidu no komidade sira seluk liuhusi pena prizaun fulan sia suspende ba tinan ida.

Enkuantu, defeza haktuir katak arguidu konfesa faktu hotu iha akuzasaun, arrepende ninia hahalok, diak malu ona ho lezada, foin primeiravés halo agresaun hasoru lezada no iha oan ida. Tanba ne'e, husu ba tribunál fó pena ne'ebé kma'an liu ba arguidu.

Desizaun

Depoisde avalia faktu hotu, tribunál prova katak arguidu no lezada diskute malu no arguidu foti fatuk tuda dala rua iha lezada nia kotuk laran, tuku dala ida iha matan, silu lezada nia liman ba kotuk, riba lezada ba kama laran. Bainhira lezada hadeer no halai sai ba liur, tribunál prova arguidu duni tuir, toman lezada no tuku dala haat iha lezada hasan sorin karuk. Bazeia ba faktu provadu no sirkunstánsia sira, tribunál konklui no kondena arguidu ho pena prizaun fulan ualu suspende ba tinan ida fulan ualu no kondena arguidu selu kustu judisiál US\$10.00.

4. Krime ofensa ba integridade física simples ho natureza violénsia doméstika

Nú. Prosesu : 0042/17. BCBCV
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Gustavo A. M. da Silva
Defeza : Dr. Sidonio M. Sarmiento
Desizaun : Pena prizaun fulan 7 suspende ba tinan 1 fulan 7

Iha 06 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu FSB hasoru nia feen, iha Distritu Baukau.

Akuzasaun Prokuradór

Prokuradór akuza katak iha 01 Jullu 2017, oras tuku 14:00 lokraik, lezada fó hela susu ba sira nia oan ne'ebé sei ki'ik, derrepente arguidu mosu mai no basa dala ida iha lezada nia hasan, tuku dala rua iha lezada nia matan sorin loos no tebe maka'as dala rua iha lezada nia kidun. Arguidu rakut lezada nia fuuk to'o lezada monu ba rai no bainhira lezada hamrik, arguidu foti fatuk tuku dala ida iha lezada nia ulun rezulta kanek ki'ik no ran. Agresaun hirak ne'e rezulta lezada halo tratamentu iha Sentru Saúde Baukau.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak arguidu foin fila husi nia kuiñadu sira nia uma no lezada ko'alia barak hasoru arguidu. Tanba ne'e mak arguidu halo agresaun hasoru lezada tuir faktu sira iha akuzasaun. Arguidu mós deklara katak depoisde akontesimentu liutiha oras balun, sira diak malu filafali. Arguidu foin primeiravés hatan iha tribunál tanba ne'e arguidu arrepende tebes ninia hahalok no to'o agora la baku ona lezada.

Entretantu, lezada konfirma faktu hotu iha akuzasaun prokuradór nian no deklara katak depoisde akontesimentu sira diak malu filafali no to'o agora arguidu la baku ona lezada.

Alegasaun final

Prokuradór konsidera arguidu provadu komete krime hasoru lezada bazeia ba deklarasaun arguidu nian no depoimentu hosi lezada. Prokuradór reforsa tan katak kuaze lor-loron Tribunál Distritál Baukau halo julgamentu ba krime violénsia doméstika. Tanba ne'e, atu halo prevensaun ba krime refere, husu ba tribunál atu aplika pena tuir konviksaun tribunál nian.

Enkuantu, defeza husu ba tribunál atu kondena arguidu ho pena ne'ebé justu tanba haree ba sirkunstánsia atenuante sira hanesan arguidu konfesa, arrepende ninia hahalok, diak malu ona ho lezada no to'o agora la baku ona lezada. Arguidu mós iha oan na'in rua ne'ebé nesesariamente rekere arguidu nia prezensa nu'udar aman no responsabilidade hodi tau matan.

Desizaun

Depoisde avalia faktu hotu, tribunál prova katak arguidu fila ba uma no basa dala ida iha lezada nia hasan, tuku dala rua iha lezada nia matan sorin loos, tebe maka'as dala rua iha lezada nia kidun, rakut lezada nia fuuk to'o lezada monu ba rai. Bainhira lezada hamrik mai, arguidu foti

fatuk tuku dala ida iha lezada nia ulun rezulta kanek no ran sai. Tribunál prova katak arguidu halo agresan ne'e bainhira lezada fó hela susu ba sira nia oan. Bazeia ba faktu provadu no sirkunstánsia atenuante no agravante sira, tribunál konklui no kondena arguidu ho pena prizaun fulan hitu suspende ba tinan ida fulan hitu.

5. Krime ofensa ba integridade fízika simples ho natureza violénsia doméstika

Nú. Prosesu : 0009/16. VQLLT
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Domingos Gouveia Barreto
Defeza : Dr. Sidonio M. Sarmiento
Desizaun : Pena prizaun fulan 8 suspende ba tinan 1 no selu indemnizasaun sivil US\$50.00

Iha 09 Maiu 2019, Tribunál Distritál Baukau prezide julgamentu leitura ba krime ofensa ba integridade fízika simples ho natureza violénsia doméstika ne'ebé envolve arguidu JS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 24 Dezembru 2016, oras tuku 16:00 lokraik, arguidu ho lezada hamutuk ho nia oan sira ba arguidu nia inan aman nia uma. Sira ba ho ojetivu atu halo serbisu kona-ba serimónia halo lia iha nia inan-aman nia uma. Bainhira serimónia hotu, lezada husu ba arguidu atu fila uluk mai uma. Iha oras tuku 02:00 madrugada, arguidu ho kondisaun lanu fila ba uma no mosu diskute malu entre arguidu no lezada no arguidu tuku dala haat iha lezada nia isin, tebe dala ida iha lezada nia kidan, kamat lezada nia kakorok, nune'e liman kukun kona lezada nia kakorok halo mean no moras.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa faktu hotu iha akuzasaun no deklara katak arrepende ninia hahalok no promete sei la komete tan krime iha futuru maske arguidu la moris hamutuk ona ho lezada. Arguidu mós deklara katak sira forma família iha 2003, iha oan na'in lima no primeiravés komete krime hasoru lezada.

Lezada mós kontinua konfirma faktu sira iha akuzasaun no deklara agresan ne'e mosu tanba arguidu deskonfia lezada iha relasaun domin ho mane seluk. Hanesan arguidu nia deklarasaun, lezada mós hateten katak tanba arguidu ninia hahalok ne'e lezada deside moris separa ho arguidu no oan sira hela ho lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu no lezada nia deklarasaun. Aleinde ne'e, konsidera mós katak Tribunál Distritál Baukau kuaze lor-loron halo julgamentu ba krime violénsia doméstika, nune'e husu tribunál fó pena ne'ebé adekuada ba arguidu hodi eduka arguidu no comunidade sira seluk, através hosi kondena arguidu ba pena prizaun fulan sia suspende ba tinan rua.

Enkuantu, defeza haktuir katak arguidu konfesa faktu sira hotu iha akuzasaun, arrepende ninia hahalok no foin primeiravés mai hatan iha tribunál. Tanba ne'e, husu ba tribunál aplika pena ne'ebé kmaan ba arguidu.

Desizaun

Depoizde avalia faktu hotu, tribunál prova katak arguidu deskonfia lezada iha relasaun ho mane seluk nune'e sira diskute malu no arguidu tuku dala rua iha lezada nia ulun, tuku dala rua iha kotuk laran, tebe dala rua iha ulun, kamat kakorok no liman kukun kona kakorok halo kakorok mean. Tanba arguidu nia hahalok ne'e lezada decide moris separa ho arguidu. Bazeia ba faktu provadu sira ne'e no sirkunstánsia sira hotu, tribunál kondena arguidu ho pena prizaun fulan ualu suspende ba tinan ida no selu indemizasaun sivíl ba lezada US\$50.00. Tribunál mós kondena arguidu selu kustu judisiál US\$10.00.

6. Krime maus tratus ba kónjuje

Nú. Prosesu	: 0038/15. VQSIC
Kompozisaun Tribunál	: Koletivu
Juis	: Dr. Jose Gonçalves, Dra. Ersilia de Jesus no Dr. Jose Escuriál
Prokuradór	: Dr. Luis H. Rangel da Cruz
Defeza	: Dr. Sidonio M. Sarmiento
Desizaun	: Pena prizaun tinan 3 fulan 6

Iha 09 Maiu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé envolve arguidu DSA hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 15 Novembru 2015, iha oras kalan fahe-rua, arguidu fila mai uma ho kondisaun lanu no tama ba kuartu laran no husu lezada kona-ba atividade ne'ebé atu halo ohin loron nian. Hafoin sira diskute malu no arguidu tuku dala rua iha lezada nia kotuk laran, tebe dala ida knosen sorin loos halo lezada monu ba rai no arguidu tebe dala tolu tan iha lezada nia knosen sorin loos.

Liu tiha fulan lima, iha 12 Marsu 2016, oras tuku 19:15 kalan, hafoin han hotu arguidu dehan ba lezada atu lezada ba deskansa ona, nune'e lezada mós tama ba kuartu laran. Arguidu tama tuir ba kuartu laran maibé antes tama ba kuartu laran, arguidu foti tua atu hemu iha kuartu laran. Maibé lezada bandu arguidu hemu tua iha kuartu laran nune'e sira diskute malu no arguidu tuku dala rua iha lezada nia hirus-matan halo lezada monu ba rai. Bainhira lezada monu iha rai, arguidu tebe dala haat iha lezada nia kabun, hasai lezada nia rupa no foti aimanas kose ba lezada nia orgaun seksuál. Arguidu mós foti diman tenta atu sona lezada no ho kondisaun molik lezada halai ba nia oan Joanico Soares nia uma. Durante moris hamutuk arguidu sempre hemu tua no deskonfia lezada iha relasaun domin ho mane seluk.

Prokuradór akuza arguidu kontra artigu 154 KP kona-ba krime maus tratus ba kónjuje ho nia moldura penál husi tinan 2 to'o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa totalmente ba faktu hotu iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu ne'e lezada ba hela tiha iha nia maun sira. Agora dadaun sira moris separa ona tanba lezada lakohi atu fila ba arguidu maski arguidu ba tuir lezada dala rua.

Aleinde ne'e, lezada mós konfirma faktu sira iha akuzasaun no aumenta katak arguidu sei halai tuir no tuku tan lezada nia kotuk laran bainhira lezada halai ba nia oan nia uma. Lezada deklarata katak durante loron tolu lezada sofre moras no nia oan sira mak tau matan, nono bee manas hodi hanas no fó haris lezada. Depoisde akontesimentu ne'e, lezada filafali ba hela hamutuk ho arguidu maibé tanba arguidu repete ninia hahalok, ho nune'e lezada diside ba hela ho nia maun sira to'o agora.

Alegasaun finál

Prokuradór haktuir katak arguidu konfesa faktu sira no lezada mós konfirma faktu sira katak durante moris hamutuk arguidu sempre halo agresan fíziku hasoru lezada no arguidu mós iha ona antesidente kriminál. Tanba ne'e, husu ba tribunál atu aplika pena ne'ebé forte ba arguidu liuhusi kondena arguidu ho pena prizaun tinan tolu fulan neen.

Enkuantu, defeza husu ba tribunál atu kondena arguidu ho pena ne'ebé adekua ho konsiderasaun sira katak arguidu konfesa, arrepende ona ninia hahalok, arguidu tenta atu diak malu ho lezada maibé lezada mak lakohi atu di'ak malu ho arguidu.

Desizaun

Depoisde avalia faktu hotu, tribunál konklui katak arguidu tuku dala rua iha lezada nia kotuk laran, tebe dala ida knosen sorin loos halo lezada monu ba rai no arguidu tebe tan dala tolu iha knosen sorin loos.

Tribunál mós prova katak liutiha fulan lima husi akontesimentu primeiru, tanba lezada bandu arguidu hemu tua iha kuartu laran, arguidu tuku dala rua iha lezada nia hirus-matan halo lezada monu ba rai. Arguidu kontinua tebe dala haat iha lezada nian kabun, hasai lezada nia roupa no foti aimanas kose ba lezada nia orgaun seksuál. Tribunál mós prova arguidu foti diman no tenta atu sona lezada maibé la konsege tanba lezada halai tiha. Arguidu halai tuir lezada no tuku dala ida iha lezada nia kotuk laran. Arguidu ninia hahalok ne'e halo lezada moras durante loron tolu no nia oan mak nono bee manas hodi hanas no lezada hariis. Tribunál prova katak depoide akontese lezada konsege fila ba hela hamutuk fali ho arguidu maibé tanba arguidu repete tan agresau hasoru lezada, nune'e lezada diside ba hela ho nian maun sira.

Bazeia ba faktu provadu sira ne'e hotu no sirkunstánsia atenuante hanesan arguidu konfesa no sirkunstánsia agravante sira hanesan arguidu halo tratamentu aat hasoru lezada no tribunál kondena arguidu ho pena prizaun tinan tolu fulan neen iha prizaun.

7. Krime maus tratus ba kónjuje

Nú. Prosesu : 0036/15.VQSIC
Kompozisaun Tribunál : Koletivu
Juis : Dr. Jose Gonçalves, Dr. Jose Escurial no Dra. Ersilia de Jesus
Prokuradór : Dr. Domingos G. Barreto
Defeza : Dr. Antonio Fernandes
Desizaun : Pena prizaun tinan 2 suspende ba tinan 2

Iha 09 Maiu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé mak envolve arguidu CS hasoru nian feen, iha Distritu Vikeke.

Akuzasaun Prokuradór

Prokuradór akuza katak iha 06 Outubru 2015, oras tuku 19:00 kalan, arguidu no lezada foin fila hosi halo uma. Tanba kolen, lezada tama ba uma laran no deskansa. Iha tempu hanesan sira nia oan tanis. Lezada rona sira nia oan tanis ne'e maibé tanba kolen liu, lezada la ba ko'us. Arguidu hakilar ba lezada ho lian maka'as atu haruka lezada ba ko'us sira nia oan ne'e. Lezada hadeer duni atu ba ko'us sira nia oan ne'e maibé arguidu hakat ba lezada no basa dala rua iha lezada nian hasan, tebe dala ida iha kidan halo lezada monu ba rai. Depoide akontese ne'e lezada ba hela ho nia bin durante fulan ida.

Durante arguidu no lezada moris hamutuk, bainhira arguidu iha kondisaun lanu arguidu sempre halo agresaun fíziku hasoru lezada. Arguidu nia hahalok ne'e halo lezada moris iha presaun nia-laran.

Prokuradór akuza arguidu kontra artigu 154 KP kona-ba krime maus tratus ba kónjuje ho nia moldura penál husi tinan 2 to' o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak depoisde akontesimentu iha 2015 to' o agora arguidu la baku ona lezada. Arguidu mós kompromete ba tribunál katak sei la hemu ona tua, sei la repete tan hahalok sira ne'e iha futuru. Arguidu foin primeiravés mai hatan iha tribunál no arguidu mak sustenta família nia nesesidade.

Entretantu, lezada kontinua konfirma totalmente faktu sira iha akuzasaun no konfirma mós ho deklarasaun arguidu nian katak depoisde akontesimentu iha 2015, to' o agora arguidu la baku ona lezada.

Alegasaun finál

Prokuradór haktuir katak arguidu provadu halo tratamentu aat hasoru lezada. Prokuradór mós prova katak arguidu hemu tua sempre halo agresauun hasoru lezada. Bazeia ba prova sira ne'e, husu ba tribunál atu aplika pena prizaun tinan rua suspende ba tinan rua ba arguidu.

Entretantu, defeza husu ba tribunál atu aplika pena ne'ebé bele prevene arguidu nia hahalok iha futuru, tanba arguidu konfesa, arrepende ninia hahalok, di'ak malu ona ho lezada no primeiravés mai hatan iha tribunál. Aleinde ne'e, arguidu mak sustenta sira nesesidade uma-laran nian.

Desizaun

Depoisde avalia faktu hotu, tribunál prova katak arguidu basa dala rua iha lezada nian hasan, tebe dala ida iha kidan halo lezada monu ba rai. Depoisde akontesimentu ne'e, lezada ba hela ho nia bin durante fulan ida. Durante moris hamutuk arguidu sempre halo agresauun hasoru lezada. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, di'ak malu ona ho lezada no foin primeiravés mai hatan iha tribunál, ho nune'e tribunál kondena arguidu ho pena prizaun tinan rua suspende ba tinan rua.

8. Krime ofensa ba integridade física simples ho natureza violénsia doméstika

Nú. Prosesu	: 0015/18. BCSIC
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Gustavo A. M. da Silva
Defeza	: Dr. Sidonio M. Sarmiento
Desizaun	: Pena prizaun fulan 9 suspende ba tinan 1

Iha 09 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu TP hasoru nia feen, iha Distritu Baukau.

Akuzasaun Prokuradór

Prokuradór akuza katak iha 06 Dezembru 2018, iha oras tuku 23:00 kalan, arguidu no lezada diskute malu no arguidu foti ai-suak no uza nia lolon baku dala haat iha lezada nia kelen rezulta bubu, metan no moras. Arguidu no lezada diskute malu kona-ba lezada husu osan ba arguidu atu ba sosa labarik nia pampers (*popok*) maibé arguidu deskonfia lezada atu ba hasoru mane seluk.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu admite katak faktu sira ne'ebé prokuradór akuza ba arguidu ne'e loos hotu. Arguidu deklara katak sira diak malu ona perante família, durante moris hamutuk arguidu foin primeiravés komete krime hasoru lezada. Arguidu serbisu nu'udar argrikultór no laiha rendimentu fixu kada fulan, arrende nia hahalok ne'e no deposite akontesimentu ne'e to'o agora la baku ona lezada.

Entretantu lezada deklara katak arguidu la'os uza ai-suak nia lolon baku dala haat iha kelen maibé baku dala ida iha lezada nia kelen, dala ida iha ain-tuur, dala ida iha kanotak no dala ida iha liman sikun rezulta metan, bubu no moras. Maibé diak malu ona ho arguidu, arguidu foin primeiravés komete krime no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós hosi lezada. Tribunál halo prosesu no desizaun ba krime ho natureza violénsia doméstika ho número ne'ebé barak no kondena todan maibé krime ne'e kontinua akontese. Reflete ba razaun hirak ne'e husu nafatin atu halo prevensaun ida forte ba arguidu mezmua sira diak malu. Tanba ne'e, husu ba tribunál kondena arguidu tuir tribunál nia konviksaun.

Enkuantu defeza haktuir katak arguidu konfesa faktu hotu iha akuzasaun, foin primeiravés komete krime hasoru lezada, arrende ona ninia hahalok no diak malu ona ho lezada. Tanba ne'e husu ba tribunál fó pena ne'ebé adekua ba arguidu hodi proteje lezada no garantia seguru ba lezada nia moris iha futuru.

Desizaun

Depoisde avalia faktu hotu, tribunál prova katak arguidu foti ai-suak no baku dala ida iha lezada nia kelen, baku dala ida iha ain-tuur, baku dala ida iha kanotak no baku dala ida iha liman-sikun.

Bazeia ba faktu provadu sira ne'e no sirkunstansia sira, tribunál kondena arguidu ho pena prizaun fulan sia suspende ba tinan ida no kondena arguidu selu kustu judisiál US\$10.00.

9. Krime ofensa ba integridade fízika simples ho natureza violénsia doméstika

Nú. Prosesu : 0004/18.LALRO
Kompozisaun Tribunál : Singulár
Juis : Dr. Jose Quintão
Prokuradór : Dra. Remizia de Fatima da Silva
Defeza : Dr. Sidonio M. Sarmiento
Desizaun : Pena prizaun fulan 4 suspende ba tinan 1

Iha 09 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdC no arguida MM (arguidu CdC nia inan) hasoru arguidu (CdC) nia feen boot, iha Distritu Lautem.

Akuzasaun Prokuradór

Prokuradór akuza katak iha 10 Agostu 2018, oras tuku 19:00 kalan, arguidu CdC ho lezada diskute malu kona-ba planu arguidu ho feen ki'ik atu halo uma ketak maibé lezada la aseita, nune'e, arguidu basa dala rua iha lezada nia hasan sorin karuk rezulta bubu no moras. Aleinde ne'e, arguidu CdC mós tolok lezada. Entretantu, arguida MM nu'udar lezada nia banin fetu, ka'er lezada nia faru no rasta lezada ba mai no tuku dala ida iha lezada nia hirus-matan.

Prokuradór akuza arguidu no arguida kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu CdC rekoñese ninia hahalok tuir faktu sira iha akuzasaun no deklarata katak arrepende ninia hahalok no diak malu ona ho lezada to'o agora. Arguidu mós deklarata katak durante moris hamutuk ho lezada foin primeiravés komete krime hasoru lezada. Arguidu nu'udar argrikultór no laiha rendimentu fixu kada fulan, arguidu iha feen rua no oan na'in rua. Entretantu arguida MM deklarata katak iha momentu ne'ebá nia ka'er lezada nia faru ho intensaun atu dada sees tiha lezada husi arguidu maibé arguida nia liman kona lezada nia hirus-matan bainhira lezada atu halai.

Iha parte seluk, lezada konfirma faktu sira iha akuzasaun no deklarata katak maski arguidu hola fetu ki'ik maibé lezada hakarak sira hela hamutuk nafatin tanba lezada laiha oan no hakarak haree feen ki'ik nia oan. Lezada mós konfirma ho arguidu nia deklarasaun katak to'o agora arguidu la baku ona lezada.

Alegasaun final

Prokurador haktuir katak arguidu CdC no arguida MM provadu komete krime hasoru lezada. Arguidu CdC konfesa ninia hahalok no arguida MM deklara katak nia laiha intensaun baku lezada. Maski arguidu no arguida konfesa no arrepende ona sira nia hahalok maibe kazu barak mak arguidu sira mai hatan iha tribunál no promete la baku ona lezada sira maibe dala ruma sira repete sira nia hahalok. Bazeia ba konsiderasaun ne'e, presiza halo prevensaun iha futuru no husu tribunál kondena arguidu CdC ho pena prizaun tinan ida suspende ba tinan rua. Entretantu ba arguida MM, husu ba tribunál atu kondena arguida ho pena prizaun fulan tolu suspende ba tinan ida.

Iha parte seluk, defeza husu ba tribunal atu kondena arguidu CdC ho pena ne'ebé kma'an liu tanba arguidu konfesa faktu sira, arrepende ninia hahalok, foin primeiravés komete krime hasoru lezada no diak malu ona ho lezada. Entretantu ba arguida MM, konsidera katak arguida laiha intensaun baku lezada maibe atu hafahe lezada husi arguidu. Tanba ne'e, husu ba tribunál atu omologa arguida MM husi krime ne'e tanba konsidera lezada la dependénsia ekonómia ba arguida.

Desizaun

Depoide avalia faktu hotu, tribunál prova katak arguidu CdC no lezada diskute malu tanba la konkorda ho arguidu nia hanoin atu halo uma ketak ba arguidu no arguidu nia feen ki'ik. Tribunál mós prova katak arguidu basa dala rua iha lezada nia hasan sorin karuk no tolok lezada.

Entretantu ba arguida MM, tribunál prova katak arguida ka'er lezada nia faru hodi rasta lezada ba mai no tuku dala ida iha lezada nia hirus-matan. Tribunál konsidera arguidu CdC, arguida MM no lezada hela hamutuk no lezada iha dependénsia ekonómia ba arguidu no arguida. Bazeia ba faktu provadu sira no sirkunstánsia sira hotu, tribunál konklui no kondena arguidu CdC no arguida MM ho pena prizaun ba kada arguidu no arguida ho pena fulan haat suspende ba tinan ida.

10. Krime ofensa ba integridade fizika simples ho natureza violénsia doméstika

Nú. Prosesu : 0063/17. MNMNT
Kompozisaun Tribunál : Singulár
Juis : Dr. Hugo da Cruz Pui
Prokurador : Dra. Remizia de Fatima da Silva
Defeza : Dr. Grigorio de Lima
Desizaun : Pena multa US\$30.00

Iha 15 Maiu 2018, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JdC hasoru nia feen, iha Distritu Manatuto.

Akuzasaun Prokuradór

Prokuradór akuza arguidu katak iha 30 Outubru 2017, iha oras tuku 22:00 kalan, arguidu basa dala ida iha lezada nian kabaas no basa dala ida iha lezada nia hasan sorin karuk. Hafoin ida-ne'e, lezada halai sai tiha ba liur no telefone ba iha polísia no polísia mai kaptura arguidu.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa ninia hahalok no deklara katak nia komete krime ne'e tanba lezada ko'alia barak bainhira arguidu fila tarde husi hariis. Arguidu mós deklara katak durante moris hamutuk arguidu foin primeiravés halo agresau hasoru lezada, arguidu arrepende ona nia hahalok ne'e no deklara katak sira diak malu to'o agora.

Aleinde ne'e, lezada mós kontinua konfirma faktu sira iha akuzasaun inklui deklarasaun arguidu nian katak to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada. Tanba ne'e, husu ba tribunál kondena arguida ho pena prizaun fulan neen suspende ba tinan ida.

Enkuantu defeza husu ba tribunál atu kondena arguida ho pena ne'ebé adekuaudu ho konsiderasaun sira katak durante sira moris hamutuk iha tempu naruuk arguidu foin primeiravés komete krime hasoru lezada. Arguidu arrepende ona ninia hahalok no diak malu ona ho lezada.

Desizaun

Depoide avalia faktu hotu, tribunál prova katak arguidu basa dala ida iha lezada nia kabaas no basa dala ida iha lezada nia hasan sorin karuk. Bazeia ba prova sira ne'e, tribunál konklui no kondena arguidu ho pena multa US\$30.00 ne'ebé sei selu US\$0.50 kada loron durante loron 60. Bainhira arguidu la selu pena multa ne'e, arguidu sei kumpri iha prizaun durante loron 40 nu'udar pena alternativa ba arguidu.

11. Krime ofensa ba integridade fízika simples ho natureza violénsia doméstika

Nú. Prosesu	: 0022/18. MNLCL
Kompozisaun Tribunál	: Singulár
Juis	: Dr. Antonio Fonseca
Prokuradór	: Dar. Remizia de Fatima da Silva
Defeza	: Dr. Jose M. Guterres
Desizaun	: Pena prizaun fulan 7 suspende ba tinan 1 ho regra ba konduta

Iha 28 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu GdJ hasoru nia feen, iha Distritu Manatutu.

Akuzasaun prokuradór

Prokuradór akuza katak iha 19 Novembru 2018, oras tuku 18:00 lokraik, arguidu tebe dala ida iha lezada nia kotuk laran, rasta lezada ba iha hadak-leten. Hafoin tuku dala tolu iha kanuruk, tuku dala ida iha kabaas sorin karuk. Lezada halai ba nia inan no arguidu halai tuir lezada. Bainhira arguidu duni tuir lezada ne'e, arguidu ka'er mós ho au ida maibé la baku lezada. Antes ne'e, iha 10 Novembru 2018, arguidu tuku dala iha lezada nia matan laran no rezulta bubu no metan.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak arrepende ona ninia hahalok no la baku ona lezada. Arguidu mós deklarata katak foin primeiravés komete krime hasoru lezada, diak malu ona ho lezada perante família rua no arguidu mós husu ona deskulpa ba lezada ho tais ida. Arguidu no lezada forma uma-kain iha 2017, serbisu nu'udar agrikultór no iha oan na'in rua.

Aleinde ne'e, lezada mós kontinua konfirma faktu sira iha akuzasaun no deklarasaun arguidu nian katak sira diak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu sira iha akuzasaun no konfirma mós husi lezada. Maibé kuaze lor-loron tribunál halo julgamentu no kondena autór sira husi krime ho natureza violénsia doméstika maibé realidade krime ne'e aumenta ba bei-beik. Tanba ne'e, husu ba tribunál atu aplika pena prizaun fulan neen suspende ba tinan ida fulan neen ba arguidu.

Enkuantu parte defeza haktuir katak arguidu konfesa faktu sira iha akuzasaun, arguidu rasik hatudu nia arrependimentu no diak malu ona ho lezada. Haree mós ba arguidu ho lezada nia deklarasaun katak durante moris hamutuk arguidu foin primeiravés baku lezada. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu komete duni krime ofensa ba integridade fízika simples rua hasoru lezada. Primeiru krime akontese iha 10 Novembru 2018 no segundu krime akontese iha 19 Novembru 2018. Ba krime primeiru, tribunál kondena arguidu ho pena prizaun fulan neen no ba krime segundu tribunál kondena arguidu ho pena prizaun fulan tolu. Husi pena ba krime rua ne'e, tribunál halo akumulasaun no kondena arguidu ho pena únika fulan hitu suspende ba tinan ida no aplika regra ba konduta atu arguidu apresenta-an periódikamente kada fulan durante fulan hitu ba iha tribunál. Tribunál mós kondena arguidu selu kustu judisál US\$10.00.

12. Krime abuzu seksuál ba menór ho agravasaun

Nú. Prosesu : 0009/18.BCQLC
Kompozisaun Tribunál : Koletivu
Juis : Dr. Jose Escurial, Dr. Hugo da Crus Pui no Dr. Jose Gonçalves
Prokuradór : Dr. Gustavo A. M. da Silva
Defeza : Dr. Gregório de Lima
Desizaun : Pena prizaun tinan 13

Iha 28 Maiu 2019, Tribunál Distritál Baukau prezide julgamentu leitura akordaun ba krime abuzu seksuál ba menór ne'ebé mak envolve arguidu GX hasoru lezada nu'udar nia bei-oan ho idade tinan 11 fulan 8, iha Distritu Baukau.

Akuzasaun Prokuradór

Prokuradór akuza arguidu katak iha 11 Abril 2018, oras la apuradu maibé iha tempu kalan, lezada iha hela nia kuartu laran no arguidu bolu lezada sai ba liur. Bainhira lezada sai ba liur, arguidu dehan ba lezada katak ita ko'us malu mak sente gostu. Hafoin arguidu kous sa'e tiha lezada no lori nia liman lamas lezada nia kidun no orgaun seksuál. Momentu ka'er lezada ne'e, arguidu husu ba lezada katak ka'er hanesan ne'e ó sente gostu ka lae. Arguidu bandu lezada atu la konta sai ba ema seluk no promete sei fó osan ba lezada bainhira arguidu simu osan.

Hafoin ida ne'e, arguidu mós hameno ba lezada atu iha aban dadersan lezada tuir arguidu iha to'os atu halo. Bainhira rona arguidu ko'alia hanesan ne'e, lezada husu fila-fali ba arguidu katak atu halo saida. Arguidu dehan ba lezada katak aban ó ba mak ita halo. Hafoin arguidu hatun fali lezada no lezada ba tiha dapur hodi nono bee no la kesar ba ema seluk.

Iha loron tuir mai, iha oras meiudia, lezada ba tuir arguidu iha to'os, no lezada haree arguidu tuur mesak iha fatuk leten. Arguidu haree lezada no bolu kedas lezada ba tuur hamutuk ho arguidu iha fatuk leten. Arguidu dehan ba lezada katak ita ko'us malu mak diak, hafoin arguidu ko'us ka hiti lezada, hako'ak metin no rei lezada nia inus. Hafoin arguidu hodi lezada ba iha talas laran, arguidu hasai lezada nian rupa no hodi liman lamas lezada nia orgaun seksuál. Arguidu hatama nia liman fuan ba lezada nian orgaun seksuál no halo movimentasaun dala rua no arguidu husu

ba lezada katak ó sente gostu ka lae. Arguidu haruka lezada toba tun ba iha talas leten no arguidu kolu nia kalsa no halo relasaun seksuál ho lezada. Maibé derrepente arguidu nian feen ba iha fatin refere no ka'er toman bainhira arguidu halo hela relasaun seksuál ho lezada. Tanba ne'e, arguidu nia feen ba hato'o kedas keixa iha xefe aldeia.

Antes ne'e, iha tinan 2018, arguidu mós halo ona hahalok hanesan hasoru lezada, arguidu ka'er no buti lezada nia kelen no susun.

Prokurador akuza arguidu kontra artigu 177 KP kona-ba abuzu seksuál ba menór ho agravasaun tuir artigu 182 (1 alinea a) KP no konjuga ho artigu 2, 3(c), 35(b) no 36 LKVD.

Produsaun ba provas

Iha julgamentu, arguidu rekoñese katak lezada nu'udar nia bei-oan no hela ho arguidu. Arguidu konfesa katak ko'us duni lezada no buti duni lezada nian kidun no susun. Entretantu faktu iha to'os laran, arguidu deklara katak hafoin hamoos to'os hotu, arguidu sente kolen no tuur hela iha fatuk leten. Lezada ba iha to'os no ka'er arguidu nia isin no oin nune'e mak arguidu ko'us no rei malu ho lezada no ikus arguidu ho lezada ba iha talas laran to'o akontese relasaun seksuál. Arguidu deklara katak la'os arguidu mak hasai lezada nia kalsa maibé lezada rasik mak hasai nia kalsa. Arguidu arrepende nia hahalok no foin primeiravés mai hatan iha tribunal. Arguidu hetan pensaun ba veteranus kada fulan simu osan US\$275.00.

Entretantu, lezada konfirma faktu sira iha akuzasaun no deklara katak arguidu ameasa atu sona mate lezada nune'e lezada la hakilar no la fó hatene ba ema seluk. Aleinde ne'e, arguidu promete ba lezada katak bainhira lezada la dehan ba ema seluk, arguidu sei foti osan iha banku hodi fó ba lezada atu sosa rupa no sapatu maibé realidade arguidu la sosa buat hirak ne'e.

Testemuña AX nu'udar arguidu nia feen (lezada nia avo-feto ki'ik) depoimenta katak iha altura ne'ebá testemuña rasik mak haruka lezada atu ba to'os hodi foti lakeru atu daan ho batar. Iha momentu ne'ebá testemuña mós ba to'os atu foti fahi nia hahan no testemuña haree arguidu ho lezada ko'us malu no rei malu hela iha fatuk leten. Bainhira haree ne'e, testemuña sei hafuhu tuir no haree arguidu ho lezada lori malu ba iha talas laran.

Testemuña tuir tan arguidu no lezada no maizumenus husi distansia metru haat husi testemuña nia hamrik hateke ba talas laran, testemuña haree talas tahan book-an maibé haree la moos ho nune'e testemuña sa'e ba fatuk leten no haree arguidu toba iha lezada nia leten ho kondisaun kalsa iha ain-tuur. Testemuña ba hasee arguidu no lezada no ba halo kedas denúnsia ba iha xefe aldeia.

Alegasaun final

Prokuradór argumenta katak arguidu konfesa faktu prinsipál sira, lezada mós konfirma faktu sira no testemuña haree akontesimentu refere. Ho materia de faktu sira ne'e hatudu katak arguidu komete duni krime abuzu seksuál ba lezada ne'ebé foin ho idade tinan 11 fulan 8. Tanba ne'e, husu ba tribunál atu kondena arguidu tuir konviksaun tribunál nian.

Enkuantu parte defeza, husu ba tribunál atu aplika pena ne'ebé adekuaudu ba arguidu tanba arguidu rekoñese no arrepende ona ninia hahalok, koopera diak ho justisa, arguidu ema ne'ebé idade avansadu ona no arguidu foin primeiravés mai hatan iha tribunál.

Desizaun

Depoizde avalia faktu sira hotu, tribunál prova katak arguidu komete duni krime abuzu seksuál hasoru lezada ne'ebé sei ho idade menór dala rua. Primeiru, akontese iha uma ne'ebé arguidu ko'us no ka'er lezada nia susun no lezada nia orgaun seksuál. Segundu akontese relasaun seksuál iha talas laran, iha to'os. Bazeia ba faktu provadu sira ne'e no sirkunstánsia sira hotu, tribunál kondena arguidu ba krime ne'ebé akontese iha uma ho pena prizaun tinan hitu no krime ne'ebé akontese iha to'os laran ho pena prizaun tinan ualu. Tribunál akumulá pena rua ne'e no kondena arguidu ho pena únika tinan 13 prizaun inklui kondena arguidu selu kustu judisiál US\$20.00.

13. Krime ofensa ba integridade física simples ho natureza violénsia doméstika

Nú. Prosesu : 0021/18. BCVMS
Kompozisaun Tribunál : Singulár
Juis : Dr. Antonio Fonseca
Prokuradór : Dr. Remizia de Fatima da Silva
Defeza : Dr. Jose M. Guterres
Desizaun : Pena prizaun fulan 3 suspende ba tinan 1

Iha 29 Maiu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu BG (ajente polísia) hasoru nia feen, iha Distritu Baukau.

Akuzasaun Prokuradór

Prokuradór akuza katak iha 26 Novembru 2018, oras tuku 17:00 lokraik, arguidu foti kadeira masa baku lezada nia kabaas parte liman loos nian no tebe dala ida iha lezada nia liman loos. Arguidu atu ka'er tan lezada nia kakorok maibé testemuña sira mai dudu sees tiha lezada ba veranda no arguidu halai tama fali ba uma laran hodi hakilar dehan imi sees para hau haree loos nia. Testemuña sira tuir arguidu ba uma laran hodi hakalma arguidu. Antes agresaun ne'e akontese, arguidu no lezada diskute malu tanba feto ida (membreu polísia) telefone ba arguidu no antes ne'e mós lezada hatene ona katak arguidu iha relasaun amante ho feto ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklarara katak arrepende ninia hahalok. Arguidu deklarara katak sira diak malu ona perante família rua. Arguidu ho lezada forma uma kain iha 1999 no iha oan na'in haat. Arguidu foin primeiravés halo agresaun fízika hasoru lezada on promete sei la komete tan krime hasoru lezada iha futuru inklui promete sei la envolve tan relasaun ho fetu ne'ebé lezada deskonfia.

Iha parte seluk, lezada kontinua konfirma faktu sira iha akuzasaun no deklarara katak depoisde akontesimentu ne'e sira diak malu ona no to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfiksaun arguidu nian no deklarasaun hosi lezada. Prokuradór mós reforsa tan katak arguidu nu'udar membru polísia ne'ebé hatene didiak kona-ba regra sira no arguidu iha obrigasaun atu proteje nia família. Tanba haree ba arguidu nia kapasidade ekonómia, husu ba tribunal aplika pena multa ba arguidu durante loron 100 ne'ebé arguidu kada loron sei selu US\$3.00.

Enkuantu, defeza husu ba tribunál atu kondena arguidu ho pena multa ne'ebé adekuaudu ba arguidu tanba haree ba sirkunstánsia atenuante sira hanesan arguidu iha oan na'in haat ne'ebé presija arguidu atu tau matan hanesan aman. Arguidu konfesa, arrepende ninia hahalok, diak malu ona ho lezada no promete sei la baku tan lezada iha futuru.

Desizaun

Depoisde avalia faktu hotu, tribunál prova katak arguidu foti kadeira masa baku lezada nia kabaas iha parte liman loos no tebe dala ida iha lezada nia liman loos. Bazeia ba faktu provadu no sirkunstánsia sira, tribunál kondena arguidu ho pena prizaun fulan tolu suspende ba tinan ida.

14. Krime maus tratus ba kónjuje

Nú. Prosesu	: 0026/17. LASIC
Kompozisaun Tribunál	: Koletivu
Juis	: Dra. Ersilia de Jesus, Dr. Jose Gonçalves no Dr. Hugo da Cruz Pui
Prokuradór	: Dr. Ambrosio Rangel Freitas
Defeza	: Dr. Sidonio M. Sarmiento
Desizaun	: Pena prizaun tinan 3 suspende ba tinan 5

Iha 31 Maiu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé envolve arguidu FdS hasoru nia feen, iha Distritu Lautem.

Akuzasaun Prokuradór

Prokuradór akuza katak loron no fulan ne'ebé la apuradu maibé iha tinan 2012, arguidu tuku dala ida iha lezada nia matan halo matan bubu boot no matan laran metan. Tuir mai, maisumenus iha tinan 2013, arguidu tebe dala ida iha lezada nia ulun halo bubu no moras. Aktu hirak-ne'e lezada hanoin barak no foti tali tau iha kakorok hodi tara-an maibé arguidu halai ba taa kotu tiha tali ne'e, nune'e halo lezada monu tun ba rai no la konsege tara an.

Iha tinan hanesan, iha 2013 maibé la lembra loron no fulan, arguidu foti viola no baku dala ida iha lezada nia ain karuk, rezulta kanek no hetan suku pontu tolu. Nune'e mós iha tinan 2014, loron no fulan la apuradu, momentu lezada ho kondisaun grávida fulan ualu, arguidu tuku lezada nia liman loos rezulta liman tohar. Liután iha tinan 2016 (la lembra loron no fulan), iha oras tuku 20:00 kalan, arguidu foti kadeira masa no tuda lezada nian ain karuk rezulta bubu no metan. Agressaun hirak-ne'e arguidu halo hasoru lezada ne'e, hahú desde tinan 2003 – 2016

Prokuradór akuza arguida kontra artigu 154 KP kona-ba maus tratus ba kónjuje ho moldura penál tinan 2 to'ó tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak faktu kona-ba liman tohar laloos maibé naksala. Arguidu deklarata katak aggressaun hirak ne'e mosu tanba sira diskute malu kona-ba nesesidade uma laran no fanu arguidu bainhira arguidu toba ne'ebé halo arguidu hakfodak. Arguidu foin primeiravés mai hatan iha tribunál, arrepende ninia hahalok no deklarata katak depoisde akontesimentu iha 2016, sira diak malu to'ó agora no la baku ona lezada. Arguidu no lezada iha oan na'in hitu no serbisu nu'udar seguransa ho saláriu US\$115.00 kada fulan.

Iha parte seluk, lezada kontinua konfirma faktu sira iha akuzasaun no deklarata katak liman la tohar maibé naksalak. Lezada konfirma mós ho arguidu nia deklarasaun sira.

Alegasaun finál

Prokuradór haktuir katak iha produsaun ba prova arguidu konfesa faktu sira hotu so deit kona-ba liman tohar arguidu deklarata katak naksalak deit no lezada konfirma ho arguidu nia deklarasaun ne'e. Durante moris hamutuk, arguidu sempre halo aggressaun ho karatér tratamentu krúel hasoru lezada. Nu'udar feen ho la'en sempre iha komunikasaun kona-ba nesesidade uma laran ba malu tanba ne'e, maibé la'os rezolve ho violénsia. Tanba ne'e husu ba tribunál atu kondena arguidu ho pena prizaun tinan tolu suspende ba tinan lima.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu foin primeiravés mai hatan iha tribunál. Aleinde ne'e, iha akontesimentu ikus arguidu hatudu nia arrendementu, no to'ogora arguidu la baku ona lezada.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha produsaun ba prova sira. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira ne'ebé nia komete, arrende ona ninia hahalok, diak malu ona ho lezada, nune'e tribunál kondena arguidu ho pena prizaun tinan tolu suspende ba tinan lima inklui kondena selu kustu judisiál US\$40.00.

15. Krime maus tratus ba kónjuje

Nú. Prosesu : 0004/19.MNMNT
Kompozisaun Tribunál : Koletivu
Juis : Dra. Ersilia de Jesus, Dr. Jose Gonçalves no Dr. Hugo da Cruz
Pui
Prokuradór : Dr. Ambrosio Rangel Freitas
Defeza : Dr. Sidonio M. Sarmiento
Desizaun : Pena prizaun tinan 2 suspende ba tinan 4

Iha 31 Maiu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé envolve arguidu AMR hasoru nia nia feen, iha Distritu Manatuto.

Akuzasaun Prokuradór

Prokuradór akuza katak iha 12 Janeiru 2019, oras tuku 21:00 kalan, arguidu hodi liman karuk tuku lezada nia kabaas parte karuk. Hafoin basa tan lezada ho liman karuk no rezulta lezada sofre moras no ba halo tratamentu iha Ospital Manatuto.

Antes ne'e, iha 02 Janeiru 2019, iha oras tuku 19:00 kalan, arguidu lori lezada ba iha ai-laran fuik ida ho intensaun atu dudu monu lezada ba rai naruuk, maibé la konsege tanba arguidu la hetan rai naruuk. Bainhira buka rai naruuk la hetan, arguidu lori liman tuku dala barak iha lezada nia kabaas parte karuk no loos no tebe dala barak iha lezada nia kelen parte karuk no loos rezulta bubu no moras.

Entretantu iha 31 Dezembru 2018, iha oras tuku 21:00 kalan, arguidu ka'er lezada nia ulun no dulas ba mai, nune'e kauza lezada ninia kakorok moras maka'as.

Durante moris hamutuk ho arguidu, lezada sempre hetan tratamentu ne'ebé la diak husi arguidu. Iha kazu antes tribunal kondena ona arguidu ho pena multa maibé arguidu la arrende ninia hahalok no kontinua halo nafatin.

Prokuradór akuza arguida kontra artigu 154 KP kona-ba maus tratus ba kónjuje ho moldura penál tinan 2 to'ó tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira no deklara katak arguidu no lezada ba duni iha ai-laran fuik maibé laiha intensaun atu oho lezada ka dudu lezada ba rai naruuk. Iha momentu ne'ebá arguidu ho lezada decide atu ba iha fatin refere hodi ko'alia kona-ba problema diskonfia malu. Bainhira sira atu fila, rai nakfilak no halo sira la'ó ba tempu kleur mak foin sira sai husi ne'ebá. Entretantu faktu sira seluk, arguidu konfesa integralmente. Arguidu mós deklara katak hafoin akontesimentu ikus ne'e to'ó agora arguidu la baku ona lezada.

Entretantu, lezada konfirma totalmente faktu sira iha akuzasaun laran inklui deklarasaun arguidu nian kona-ba rai nakfilak no arguidu laiha intensaun atu oho lezada. Lezada mós konfirma katak sira diak malu ona no to'ó agora arguidu la baku ona lezada.

Alegasaun finál

Prokuradór haktuir katak arguidu provadu komete maus tratus hasoru lezada ne'ebé tuir loloos arguidu nia responsabilidade atu tau matan. Infelismamente, pelu kontráriu arguidu mak komete fali prátika no tratamentu aat hasoru lezada nu'udar nia feen. Tanba ne'e, presiza aplika pena ne'ebé forte ba arguidu hodi prevene arguidu nia hahalok iha futuru no husu ba tribunál atu aplika pena prizaun efetiva tinan tolu iha prizaun.

Entretantu defeza hato'ó katak arguidu kooperera ho justisa hodi la difikulta tribunál atu buka verdade iha kazu ne'e. Arguidu ho lezada diak malu ona, tanba ne'e atu arguidu nafatin tau matan ba nia oan na'in haat ne'ebé presiza arguidu nia protesasaun, husu ba tribunál atu aplika suspensaun ba pena prizaun ba arguidu.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha ne'ebé prodús durante prosesu produsaun ba prova. Bazeia ba faktu provadu sira ne'e no sirkunstánsia sira hanesan arguidu konfesa faktu ne'ebé nia komete, arrepende ona ninia hahalok, diak malu ona ho lezada, nune'e tribunál kondena arguidu ho pena prizaun tinan rua suspende ba tinan haat inklui kondena arguidu selu kustu judisiál US\$40.00.

16. Krime ofensa ba integridade fízika simples ho natureza violénsia doméstika

Nú. Prosesu	: 0002/19. MNMNT
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dra. Remizia de Fatima da Silva

Defeza : Dra. Agostinha de Oliveira
Desizaun : Pena prizaun fulan 1 suspende ba tinan 1

Iha 31 Maiu 2019, Tribunál Distritál Baukau prezide julgamentu leitura sentensa ba kazu ofensa ba integriade fízika simples ho natureza violénsia doméstika ne'ebé envolve arguidu FAS hasoru nia oan, iha Distritu Manatuto.

Akuzasaun Prokuradór

Prokuradór akuza katak iha 03 Janeiru 2019, oras tuku 17:00 lokraik, arguidu foin fila hosi fa'an ikan no bainhira to'o iha uma laiha aihan. Hafoin ida-ne'e arguidu foti ai-amare nia sanak no baku dala tolu iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa ninia hahalok no deklara katak arrepende ona ninia hahalok. Arguidu mós deklara katak to'o agora la baku ona lezada. Arguidu hatutan katak nu'udar negosiante fa'an ikan, arguidu sai husi uma iha tuku 06:00 dadeer no filafali ba uma iha tuku 17:00 lokraik. Iha dadeer ne'e, arguidu hemu deit kafe. Iha momentu ne'ebá bainhira arguidu fila ba uma no haree laiha aihan ruma iha meza atu han, nune'e mak arguidu halo agresaun hasoru lezada. Arguidu iha oan hamutuk na'in hitu no foin primeiravés baku lezada.

Iha parte seluk, lezada mós kontinua konfirma faktu sira iha akuzasaun no deklara katak arguidu foin primeiravés baku lezada no depoizde akontese arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun, lezada konfirma akuzasaun, diak malu ona ho lezada, no arguidu mak sustenta família. Tanba ne'e, husu ba tribunál atu aplika pena admoestasaun.

Defeza mós husu ba tribunál atu aplika pena admoestasaun ba arguidu tanba arguidu konfesa faktu hotu iha akuzasaun, arguidu rasik hatudu nia arrependimentu, no arguidu foin primeiravés baku lezada.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun hanesan foti ai-amare nia sanak no baku dala tolu iha lezada nia kotuk laran. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan ida suspende ba tinan ida inklui kondena arguidu selu kustu judisiál US\$10.00.

Ba informasaun liután bele kontaktu:

Casimiro dos Santos

Diretór Interino JSMP

Email: santos.cas76@gmail.com

Website: <http://jsmp.tl/>